

THEODORIAS.

LAODICEA Ptol. lib. 5. cap. 15. Metropolis dicitur in Notitia antiqua Græca Theodoriadis prouinciæ à Syria extractæ, *Rhamata* Hebræis, vulgò *Lichè*. *Stephanus* Laodiceæ Metropolis Theodorianorum Antistes in actis Concilij gener. 5. legitur.

GABALA Ptol. ibid. Gibel Guill. Tyrio teste. *Flavianus* huius Episcopus habetur in epist. Synodica primæ Syriæ ad Leonem Imperatorem.

PALTOS Ptolem. ibid. *Sabas* huius Episcopus est in eadem epistola.

BALANÆA Ptol. ibid. vulgò *Valania* Nigro, & *Bagnias* Postello. *Timothei* Balanææ Episcopi memoria est in Concilio Chalcedonensi.

CILICIA PRIMA.

TARSVS Ptolemæo lib. 5. cap. 8. vulgò *Tarso* Europæis, *Terassa* incolis, & *Terfa* Turcis. *Lupus* huius Episcopus subscripsit Conciliis Ancyrano, & Neocæsariensi, & *Theodorus* Tarsi Metropolis Antistes in Concilio Chalcedonensi legitur.

POMPEIOPOLIS quæ & Soloe Ptolemæo ibid. nunc *Palesoli* dicitur. *Philomusum* huius Episcopum habet Concilium Constantinopolitanum primum, & *Matronianum* Chalcedonense.

SEBASTE, quæ & Augusta, Ptolemæo ibid. & Notit. antiq. nunc *Seuesta* dicitur. *Theodori* Augustæ Episcopi memoria est in Concilio Chalcedonensi inter Episcopos Ciliciæ.

CORICVS Ptol. ibid. vulgò *Curch* & *Curco* teste Nigro. *Germanus* Coryci Episcopus est in Concilio Constantinopolitano primo.

ADANA Ptol. ibid. vulgò *Adena* apud Curopalatem. *Cyriacus* Episcopus Adanæ in Concilio Constantinopolitano primo habetur.

MALLVS Ptol. ibid. *Mallo* adhuc Mola. & Theu. *Chrisippi* Malli Episcopi memoria est in Concilio Chalcedonensi.

ZEPHYRIVM Scylaci in Periplo, & Notitiæ antiquæ Græcæ. *Hipatinus* huius Episcopus eidem Concilio interfuit.

CILICIA SECUNDA.

ANAZARBVS. Notitiis antiquis & lib. Conc. vulgò *Acfar*, siue *Acserai* teste Leunclauio. *Orestis* Anasarbi Ciliciæ secundæ Episcopi memoria est in Concilio Chalcedonensi, & *Ætherius* Anazarbensium siue Iustinianopolitanorum Metropolita subscripsit generali quinto.

MOPSVESTIA Ptol. l. 5. c. 8. Mopsi ostia vel Lares, Mopsus Plinio, vulgò *Malmista*, aliis *Mebissse*. *Basianus* huius Episcopus in Conc. Chalced. legitur, & *Theodorus* Mopsuestiæ apud Theodoreto lib. 5. c. 39.

ÆGÆ Ptol. ibid. Ægæa Straboni lib. 14. *Alexander* Ægææ Antistes eidem Concilio Chalcedonensi adfuit.

EPIPHANIA Ptol. ibid. *Amphion* huius Episcopus subscripsit Concilij Ancyrano, Neocæsareensi & Nicæno primo, idemque Epiphaniæ Cilicum Præsul apud Sozom. lib. 1. cap. 10. dicitur.